

BILTEN




„SVAKI NEVINI ŽIVOT JE SVET I SVAKO NASILJE ZASLUŽUJE OSUDU. NEMA MANJE I VIŠE VRIJEDNE DJEČJE KRVI, MAJČINE BOLI I NEVINIH ŽIVOTA.“

Husein-ef. Kavazović, reisu-l-ulema

Photo:

A view shows houses and buildings destroyed in Israeli strikes, in Jabalia in the northern Gaza Strip, October 11, 2023. REUTERS



INFORMATIVNE NOVINE ISLAMSKJE ZAJEDNICE BOŠNJAKA U ŠVEDSKOJ
NOVEMBAR 2023. / REBI'U-L-AHIR 1445. H.G.



54

- 3 Uvodnik
- 4 Aktivnosti iz Zajednice
- 25 Duhovnost



Pored dove Gospodaru svjetova da sačuva Gazu i njen napaćeni narod, odazovimo se i na apel za prikupljanje novčanih sredstava tom narodu.

Postavimo sebi pitanje: imamo li pravo na luksuz u kojem živimo? A samo dio od tog našeg luksuza mnogima bi život značio...”

Poštovana braćo i sestre!

Ovih dana svjedočimo užasavajućim slikama iz Gaze u Palestini. Normalan čovjek ostaje bez riječi.

Iako izgleda nestvarno, nažalost, na te slike se svi pomalo navikavamo kao na nešto stvarno i, što je još gore, normalno.

Šta se desilo sa čovječanstvom?

Čime se može opravdati ubistvo preko ČETIRI HILJADE DJECE???

I još se postavlja pitanje da neko eventualno ne manipulira brojem ubijenih? Kao, nije baš toliko! Hej! Kao da nije zločin samo jedno jedino ubijeno dijete?!?

A onda neko u našoj zapitanosti prepozna neki antisemitizam! Pa se još trebamo i braniti?! Mi muslimani, koji smo kroz povijest mnogo puta Jevrejima pružali bratsko utočište.

Naravno, svjesna je to zamjena teza, na koju, nažalost, i neki od nas nasjedamo.

Zato treba jasno i glasno kazati, osuda aktuelnog režima u Izraelu nema veze sa antisemitizmom. Uostalom, ogroman je broj i Jevreja širom svijeta, pa i u samom Izraelu koji osuđuju aktuelni režim.

I da ne bude zabune. Nikom normalnom ne pada napamet da opravda Hamasove zločine 7. oktobra 2023. Naprotiv, i to je zločin koji

se ne može ničim pravdati! Ali, da taj zločin bude opravdanje za zločine kojima svjedočimo, niko normalan ne može prihvatiti.

Zapitajmo se na kraju i o onome šta bi mi pojedinačno trebali uraditi u ovoj situaciji?

Pored dove Gospodaru svjetova da sačuva Gazu i njen napaćeni narod, odazovimo se i na apel za prikupljanje novčanih sredstava tom narodu.


Postavimo sebi pitanje: imamo li pravo na luksuz u kojem živimo? A samo dio od tog našeg luksuza mnogima bi život značio.

Sjetimo se kur`anskog ajeta koji upozorava da se nikad ne zna kada neko iskušenje može i nas zadesiti:

„A iskušavat ćemo vas, sigurno, nećim – strahom, glađu, gubitkom imetka, života i ljetine. I obraduj strpljive!“ (El-Bekare: 155. ajet)

Uzvišeni Gospodaru, smiluj se nama, a posebne dove upućujemo za braću i sestre u Palestini. Amin, ja Rabbe-l-alemin!

IDRIZ-EF. KARAMAN
GLAVNI IMAM



AKTIVNOSTI IZ DŽEMATA i ZAJEDNICE

VIJEĆE MUFTIJA ISLAMSKJE ZAJEDNICE U BOSNI I HERCEGOVINI POZVALO NA HITNI PREKID RATNIH DEJSTAVA U GAZI


Vijeće muftija Islamske zajednice u Bosni i Hercegovini s dubokom žalošću i tugom izražava suosjećanje s nevinim žrtvama brutalnih napada na civile i civilne objekte u Gazi.

S velikom zabrinutošću vidimo kako događaji na Bliskom istoku pokazuju zabrinjavajuće podjele u Evropi i širom svijeta, što vodi u nepovjerenje i predrasude koje potiču dalje napetosti, trpljenje i patnju velikog broja ljudi - saopćeno je nakon sjednice Vijeća muftija održane danas u Novom Pazaru.

Dodaje se kako Vijeće muftija svoje djelovanje zasniva na islamskom učenju o miru, dobrobiti, stabilnosti i dostojanstvu ljudskog roda i posebno muslimana Bošnjaka u Bosni i Hercegovini, domovinskim zemljama i svim zemljama u kojima žive.

Vijeće muftija naglašava da nasilje koje je kao plamen obuhvatilo Bliski istok utječe na živote miliona ljudi na svijetu.

Islamsko učenje ne prihvata nasilje i terorizam, strogo osuđuje ubijanje civila, kidnapovanje ljudi, neosnovano zatvaranje i činjenje bilo koje vrste terora. Vijeće muftija poziva sve državne subjekte na poštivanje međunarodnog humanitarnog prava i zaštitu ljudskih života i sakralnih objekata. Poštujemo pravo građana da mirnim demonstracijama izražavaju svoje stavove, ali da se suzdrže od govora koji nije u skladu s islamskom etikom i poštivanjem



ISLAMSKA ZAJEDNICA U BOSNI I HERCEGOVINI

Vijeće muftija je pozvalo nosioce vlasti u BiH i regionu, kao i predstavnike medija da se suzdrže od generalizirajućih ocjena sukoba na Bliskom istoku i da izbjegnu retoriku koja vodi vjerskim podjelama.

Vijeće muftija Islamske zajednice u Bosni i Hercegovini poziva međunarodnu zajednicu na hitni prekid ratnih dejstava, da zaštiti živote ljudi u Gazi, zaustavi ubijanje civila, djece i žena, uspostavi humanitarne koridore i omogući nesmetan dostup do vode, hrane, higijenske i zdravstvene pomoći. Nužno je poštovati živote svih ljudi podjednako Palestinaca i Izraelaca, živote svih ljudi kako nas uči Kur'an: 'Ako neko ubije nekoga koji nije ubio nikoga, ili onoga koji na Zemlji nered ne čini – kao da je sve ljude poubijao; a ako neko bude uzrok da se nečiji život sačuva - kao da je svim ljudima život sačuvao' (Kur'an, El-Maide, 32) - navodi se u saopćenju.

Također, Vijeće muftija je danas pozvalo i na pravedno, dugoročno dvodržavno rješenje sukoba između Izraela i Palestine, život u miru, poštivanje individualnih i kolektivnih prava.

Muslimani i Jevreji u BiH dijele višestoljetno iskustvo zajedničkog života. Vijeće muftija jasno izražava svoj stav protiv antisemitizma i islamofobije i poziva sve vjernike da u skladu s bosansko-hercegovačkom tradicijom koncepta komšiluka i zajedništva nastave graditi društvo u kojem se svi vjernici i građani osjećaju sigurni i prihvaćeni u svome identitetu - saopćilo je Vijeće muftija.

DIREKTOR UPRAVE ZA VJERSKE POSLOVE U POSJETI ISLAMSKOJ ZAJEDNICI BOŠNJAKA U ŠVEDSKOJ



Proteklih nekoliko dana u posjeti Islamskoj zajednici Bošnjaka u Švedskoj, kao izaslanik reisu-l-uleme, boravio je direktor Uprave za vjerske poslove Rijaseta Islamske zajednice u Bosni i Hercegovini dr. hfz. Mensur-ef. Malkić.

Posjeta je započela u Geteborgu, gdje je direktor Malkić kazivao hutbu i predvodio džuma namaz u tamošnjem Džematu.

Nakon džume namaza dr. hfz. Malkić je, u društvu glavnog imama Islamske zajednice Bošnjaka u Švedskoj Idriz-ef. Karamana, krenuo put grada Örebro. U ovom gradu je sutradan, 14. oktobra, održan centralni mevlud Islamske zajednice Bošnjaka u Švedskoj, na kojem su prisustvovalе džematlije iz velikog broja gradova Švedske. Suorganizator ove prelijepe manifestacije bila je omladinska organizacija Bemuf, a izvođači imami Islamske zajednice Bošnjaka u Švedskoj. Vazu nasihat je kazivao hafiz Malkić, koji je ovu priliku iskoristio da, u ime reisu-l-uleme, uruči hafisku diplomu novom hafizu Adisu Osmanoviću, kao i dekret za novi mandat glavnom imamu Idriz-ef. Karamanu.



Nakon mevludskog programa dr. hafiz Malkić se veoma nadahnuto obratio omladini Bemufa, koja je organizirala posebno druženje za svoje članove iz cijele Švedske.

Posjetu Švedskoj direktor Malkić je završio u nedjelju, 15. oktobra, posjetom Džematu Norrköping. U društvu glavnog imama Idriz-ef. Karamana, prvo je posjetio gradilište džamije u ovom gradu, a onda prisustvovao mevludskom programu, na kojem je imao veoma zapaženo obraćanje.

I.K.



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

ODRŽAN SEMINAR ZA AKTIVNE ŽENE U DŽEMATIMA ISLAMSKJE ZAJEDNICE BOŠNJAKA U ŠVEDSKOJ



U organizaciji Komisije za ženski aktivizam Islamske zajednice Bošnjaka u Švedskoj, Džemat Malmö je 23. i 24. septembra bio domaćin desetog po redu seminara za aktivne žene džemata ove zajednice.

Cilj ovog seminara bio je afirmacija i njegovanje islamskih vrijednosti i pozitivnih praksi u vezi sa brakom, porodicom i roditeljstvom, a tema PODRŠKA PORODICI – Služba socijalnog rada u Švedskoj, nadležnosti, rad i mogućnosti saradnje. O ovoj aktuelnoj i značajnoj temi govorila je Indira Beharić, preventivni sociolog (förebyggande socionom), sa vrlo bogatim iskustvom stečenim dugogodišnjim radom u struci.

Učesnicama seminara predstavljene su aktivnosti iz ove oblasti u Islamskoj zajednici Bošnjaka u Norveškoj, koje je prezentirala gošća iz ove zajednice Velisa Salihović, muallima i koordinatorica za ženski aktivizam.

Drugog dana seminara učesnicama su se obratili glavni imam IZBUŠ-a Idriz-ef. Karaman i dr. Nezir Halilović, šef Odjela za vjeronauku Rijasetu Islamske zajednice u Bosni i Hercegovini.

ODRŽANA SJEDNICA IZVRŠNOG ODBORA IZBUŠ-A



U nedjelju, 8. oktobra 2023. godine, u gradu Örebro održana je sjednica Izvršnog odbora Islamske zajednice Bošnjaka u Švedskoj.

Na sjednici su analizirane aktivnosti u proteklom periodu, te isplanirane predstojeće.

Posebno je pohvaljena uspješna organizacija seminara za aktivne žene u džematima IZBUŠ-a, a najviše vremena sjednice posvećeno je usaglašavanju posljednjih detalja Centralnog mevluda, koji je zakazan za 14. oktobar 2023. Pored toga, precizirane su teme Savjetovanja za džemate i prihvaćena ponuda agencije Al Iman hajj & tours za zajedničku organizaciju umre u decembru 2023.

Treba kazati da je prethodni dan, u saradnji sa NBV-om i Institutom za jezik Univerziteta u Sarajevu, održan veoma uspješan seminar o bosanskom jeziku, na kojem su učešće uzeli predstavnici svih BH organizacija iz Forum integracijskih inicijativa u Švedskoj.

ODRŽANO SAVJETOVANJE ZA DŽEMATE IZBUŠ-A



U subotu, 28. oktobra 2023. godine, u Vetlandi je održano Savjetovanje za predstavnike džemata IZBUŠ-a.

Na Savjetovanju su obrađene tri teme:

1. „Administrativno poslovanje i organizacija i nadležnosti organa Islamske zajednice“ – uvodničar direktor Rijasetove Uprave za pravne i administrativne poslove Mensur Karadža
2. „Status imama u Islamskoj zajednici“ – uvodničar glavni imam IZBUŠ-a Idriz-ef. Karaman
3. „Sigurnost u džematima i druga aktuelna pitanja u IZBUŠ-u“ – uvodničar predsjednik IZBUŠ-a Mehmed Hasanbegović

Nakon predstavljenih referata prisutni su bili u mogućnosti postavljati pitanja, a onda je otvorena široka diskusija.

Na kraju je konstatirano da su ovakva savjetovanja veoma važna i da uvijek treba iznalaziti što aktuelnije teme, kao i što efikasnije moduse same organiziranizacije savjetovanja, a kasnije i realizacije samih zaključaka. I.K.

STUDIJSKO PUTOVANJE POLAZNICA KURSEVA DŽEMATA MALMÖ U ISTANBUL



Dugo planirano studijsko putovanje u Istanbul polaznica kurseva džemata Malmö sa mualimom Merjemom Jašarević bilo je organizirano u periodu od 05. 10. do 09. 10. 2023.

Grupa je brojala 30 hanuma različite životne dobi, od 20 do 70 godina.

Putovanje je počelo okupljanjem na aerodromu u Kopenhagenu odakle su letjele za Istanbul, gdje je čekao već ugovoren i organizovan prevoz, ali i plan i program putovanja sa organizovanim noćenjima uz vodiča Tarika Hrnjića, koji već duže vremena organizira turističke aranžmane za Tursku preko svoje agencije Balkan Express.

Prvog dana u Istanbulu su polaznice imale priliku prošetati centrom Istanbula i upoznati koncept grada, gdje je to bio Konstantinopolis, ali i kako se izgradila današnja Turska, slušati historiju gradnje džamija, prve kancelarije sultana, o Kapali Čaršiji, o Plavoj džamiji, o Aja Sofiji, nakon čega su hanume imale slobodno vrijeme da istražuju grad, a onda navečer su imale organizovanu zajedničku večeru u prelijepom restoranu sa pogledom na Istanbul.

Drugog dana su hanume imale priliku da obilaze i druge znamenitosti grada Istanbula, poput Pierre Lotti vidikovca, vožnje žičarom sa prelijepim pogledom, odakle se vidi Sultan Eyup džamija. Nakon časa historije o nastanku tog vidikovca, nastavili su šetnju do Eyup čarsije, a nakon toga su nastavile put prema Çamliça džamiji uživajući u njenoj ljepoti, grandioznom zdanju, uz naputke vodiča o simbolici svakog dijela arhitekture. Lijepo je i

spomenuti da je projekat za izgradnju ove moderne i višefunkcionalne džamije, bila ideja dvije studentice arhitekture.

Džamija je skroz promijenila izgled azijskog dijela Istanbula, i već postala jedan od najposjećenijih lokacija u gradu.

Navečer su hanume imale priliku uživati u turskom hamamu, i upoznati se sa istim.

Trećeg dana proputovanja Istanbulom, naše hanume započele su krstarenjem Bosforom sa pogledom na palače sultana, djevojačku kulu i druge znamenitosti Bosfora.

Nakon toga otišle su i na Taksim squer na koja svojim dugim šetalištem, brojnim radnjama i crvenim tramvajem govori o očuvanju historije i bogatstvu kulture te susretu klasičnog i modernog.

Poslije dva sahata šetnje glavnom ulicom grada, isprobavanje turske kuhinje i delikatesa, žene su nastavile sa obilaženjem velikog šoping centra Venezia.

Četvrti dan u jutarnjim satima je bio organizovan povratak u Švedsku, čime je uspješno okončano prelijepo, iskustvom i znanjem obogaćeno putovanje.

Nakon naše domovine, Bosne i Hercegovine, Istanbul je definitivno mjesto koje mnogo prija našim Bosanskim dušama.

Putovanje je, nadamo se, još više zbližilo naše džematlijeke, stvorila su se nova poznanstva i prijateljstva, ali se mnogo i naučilo o historiji Turskog naroda, i grada Istanbula.

Ovaj putopis završila bih izjavom Napoleona Bonaparte: "Da je čitav svijet jedna država, glavni grad bio bi Istanbul".

Merjema Jašarević, muallima džemata Malmö



DŽEMAT HELSINGBORG: MEVLUD

Svakodnevno se Poslanika sjećamo, ali u mjesecu Rebiul-ewelu posebno evociramo sjećanje na najodabranije stvorenje Muhammeda, Božiji mir i blagoslov neka je na njega.

Mevlud sam po sebi nije cilj, ali jeste jedan od načina da učimo o vjeri, da se srećemo i okupljamo, da se povezujemo sa dobrim i inspirativnim energijama, da zajednički budemo bolji, korisniji i plemenitiji.

Noć mevluda, odnosno rođenja Muhammeda, a.s., je posebno značajna. Bez nje ne bi bilo ni odabrane noći Kadr, jer noć Kadr je došla kao poklon Muhammedu, a.s.,

a poklon ne može biti vrijedniji od onoga kome se poklon daje.

U noći Kadr na Zemlju je sišao melek Džibril sa početkom objave Kur'ana, ali u noći rođenja poslanika Muhammeda ljudskom rodu je darovano najodabranije biće, odabranije i od meleka.

Ljudskom rodu u Rebiul-ewelu mjesecu 571. godine darovan je poslanik Muhammed i to samo kao milost svim ljudima i svim svjetovima.

Bilo je zadovoljstvo družiti se sa svim prisutnim. Posebnu zahvalnost izražavamo našoj omladini, učačima programa, zatim Benjamin-ef. Dučiću, imamu džemata Växjö, te Ismail-ef. Husiću, zamjeniku glavnog imama u Baru, koji nas je počastio prelijepim učenjem i inspirativnim obraćanjem.

Vjerujemo da će prisutnima ovaj dan ostati dugo u lijepom sjećanju.

/ Nezir Špodić, Džemat Helsingborg, 24. 9. 2023.



DŽEMAT LANDSKRONA: JUBILEJ, 30 GODINA OD OSNIVANJA

U mjesecu oktobru obilježen je jubilej u džematu Landskrona, 30 godina od osnivanja džemata, te mevlud povodom rođenja Allahovog poslanika Muhammeda s.a.v.s.

Gosti na ovom događaju iz Bosne i Hercegovine, bili su poznati vaiz i hatib, glavni imam Medžlisa Islamske zajednice Zavidovići, prof. Izet-ef. Čamdžić, te poznati interpretator ilahija i kasida Ibrahim Bilčević. Program su uljepšali mektebski učenici džemata Landskrona, ta imam džemata Malmö, Hasan-ef. Jašarević.

Obraćanje ovim povodom imali su i glavni imam IZBUŠ-a, Idriz-ef. Karaman, te domaćin ove svečanosti Suad-ef. Kazaferović.

Ovim povodom, istaknuto je koliko je važno biti dio Islamske zajednice, koja snaži, kako naše društvo, tako i pojedinca.

S.K



DŽEMAT LANDSKRONA: DŽEMATSKO DRUŽENJE



Održano je još jedno u nizu, džematsko porodično druženje u džematu Landskrona. Ovog puta, gost na druženju, a u svojstvu predavača, bio je muftija banjalučki Mr. Nusret-ef. Abidbegović.

Ovom druženju i predavanju prisustvovali su i gosti iz drugih džemata, a najveći broj njih iz džemata Halmstad.

S.K

RUŽINA STABLJICA

*Bi jednom ružina stabljika,
i bi pažljivo zasađena,
te se žile njene pružiše duboko u zemlju.
Zemlja sama bi dugo pripremana,
da taj korijen primi,
taj korijen je bio Ibrahim a.s.
Kako je izrastala
stabljika bi njegovana
da se ne razvija u ne željenom pravcu,
u pravcu koji Gospodar nije želio.
Pripremana zemlja, dubok korijen,*

te brižljiva njega učiniše

da, drvo izraste pravo i jako,

ta stabljika bi Musa a.s.

Jednog dana pojavi se divni pupoljak

do tada ne viđen

i to bi Isa a.s. sin Merjemin.

*Iz tog pupoljka izraste posljednja i naj-
ljepša ruža*

i to bi Muhammed neka je mir na njega.

/ Mustafa Širbić, pjesnik

DŽEMAT GETEBORG: DRUŽENJE SA HAFIZOM AMIR-EF. MAHIĆEM



Džemat Göteborg je 21.10.2023. godine imao priliku da ugosti uvaženog hafiza Amir-ef. Mahića, glavnog imama Medžlisa Islamske zajednice Kozarac i višeg asistenta na Islamskom pedagoškom fakultetu u Bihaću.

Program je počeo hafiz Ismet Salkanović, svršenic Behram-begove medrese u Tuzli, učenjem jednog odlomka iz Kur'ana Časnog, a onda je imam Džemata Göteborg Fuad-ef. Čolić ukratko predstavio i najavio hafiza Amir-ef. Mahića.

U svom nadahnutom predavanju hfz. Amir je, između ostalog podsjetio na važnost gradnje, jačanja, njegovanja i čuvanja džemata, posebno u dijaspori, gdje su džemati one male oaze, tj. mjesta, u kojima se čuva vlastiti identitet.

Hafiz Amir je napomenuo da je imao priliku kao muhadžir boraviti u Francuskoj još davne 1995. godine, gdje je duboko osjetio sve izazove muhadžerskog života.

Završavajući svoje predavanje, hafiz Mahić je posebno naglasio važnost sloge među Bošnjacima.

Nakon izlaganja hafiza Mahića prisutnima se obratio predsjednik Džemata Göteborg gospodin Sakib Kenjar, izrazivši zahvalnost i zadovoljstvo ovim druženjem.

Na kraju je hor Džemata "Sevsen" izveo nekoliko predivnih ilahija, a onda su prisutni nastavili druženje uz kahvu i kolače.

R.S.



DŽEMAT TRELLEBORG: MEVLUD



Dana 24.09.2023. u prostorijama lokala, za kojeg se nadamo da će postati vlasništvo i vakuf Islamske zajednice Bošnjaka u Švedskoj, džemata Trelleborg, proučen je mevludi-šerif u povodu mjeseca rođenja Allahovog Poslanika, Muhammeda a.s. Tom prilikom, prisutnima se u svojstvu domaćina programa obratio imama džemata prof. Ismail ef. Mehtić izrazivši dobrodošlicu prisutnima. U svome obraćanju, glavni imam IZBUŠ-a, Idriz ef. Karaman, je između ostalog čestitao džematskom odboru na dosadašnjem angažmanu u rješavanju potrebne dokumentacije i upotrebne dozvole uputivši dove da se proces završi u korist džemata.

Gost večeri, Dr. Nezir Halilović, voditelj Odjela za islamsku vjeornauku u Upravi za obrazovanje i nauku Rijasetu Islamske zajednice u Bosni i Hercegovini je kroz svoj inspirativan govor, podsjetio na najsuptilnije historijske detalje o ljubavi ashaba prema Poslaniku a.s., kao i na važnost intenzivnijeg sjećanja na životopis Allahova Poslanika a.s. Predivnom interpretacijom odlomaka iz mevluda, kao i



ilahija, počastili su nas, imama džemata Malmö, Hasan ef. Jašarević i Rukaja Podojak Mehtić. Nakon proučene mevludske dove, predsjednik džemata Trelleborg, Denis Rizvanović, upoznao je prisutne o koracima koje je odbor poduzeo kao i odluci Komune po pitanju upotrebne dozvole. Prisutnima je naglasio, da će se na negativnu odluku uputiti apelacija i da će o daljnjim koracima biti blgovremeno upoznati. Poslije programa, svi prisutni su mogli da pogledaju prostorije koje lokal ima. Molimo Allaha, da nam dove ukabuli i pomogne do našeg cilja, amin.

Ismail Mehtić

DŽEMAT TRELLEBORG: MARATON



U subotu, 07.10.2023. godine a u organizaciji, našeg džemata te Omladinskog udruženja BEMUF Trelleborg kao i FK City Trelleborg, održan je prvi maraton, kao sportska aktivnost, ukupne dužine 6,5 km.

Program je počeo okupljanjem u džamiji te klanjanjem akšam namaza, poslije čega su takmičari evidentirani i gdje su im podjeljeni takmičarski brojevi. Njih preko 30, odlučilo se da podrži ovu zdravu i nadasve neobično rebiul-evvelsku aktivnost u sklopu džematskih aktivnosti.

Nakon prolaska kroz cilj, pokušali smo da uzmemo neke od izjave takmičara. S obzirom da je maraton bio predviđen i za muškarce i žene, iznenadio nas je odziv ženskog dijela džemata. Jedna od takmičarki je nakon maratona i prolaska kroz cilj kazala: "...potrebno nam je ovih ili sličnih aktivnosti više, pa možda čak i na mjesečnom nivou.."

Svakako, željeli smo da kroz mubarek mjesec rebiul-evvel, pokušamo oživjeti i u praksi primjeniti savjet Allahova Poslanika a.s. kada je kazao: "Dvije blagodati većina ljudi ne zna iskoristiti, zdravlje i slobodno vrijeme." Vodeći se tim motom, vidljivo je koliko je potrebno inovirati u ponudi svome članstvu. S obzirom da se radilo o pilot projektu, za kojeg se najiskrenije nadamo da će postati i praksa u budućnosti i da će vremenom povećati zainteresiranost kod još većeg broja džematlija, možemo kazati da smo i ovaj projekat uspješno realizirali. Posebno nam je drago da su učšće uzeli svi pa čak i mektebska djeca. Iskoristili bih priliku da se zahvalimo i našem sponzoru Kake ideá na nesebičnoj podršci. Nakon programa, podjelili smo i diplome za prva tri mjesta, a pobjednička imena su:

1. Zlatna diploma: Anel Numanović,
2. Srebrna diploma: Haris Berisha,
3. Bronzana medalja: Una Topić.

Ismail Mehtić

U VETLANDI ODRŽANO VEOMA USPJEŠNO DONATORSKO VEČE



U subotu, 28. oktobra 2023. godine, Džemat Vetlanda je organizirao donatorsko veče. Kao što je poznato, ovaj Džemat je nedavno potpisao ugovor o kupovini objekta za džamiju i, s obzirom da Džemat nema dovoljno sredstava, organizirao je ovo donatorsko veče.

Specijalni gost večeri bio je jedan od najpoznatijih izvođača duhovne muzike u Bosni i Hercegovini Mustafa Isaković, a skupu su se obratili, pored domaćina, predsjednik i glavni imam IZBUŠ-a.

Kao izaslanik reisu-l-eleme, donatorskoj večeri je prisustvovao i skupu se obratio Mensur Karadža, direktor Uprave za pravne i administrativne poslove Rijasetu Islamske zajednice u Bosni i Hercegovini.

Bilo je ovo za sve prisutne jedno prelijepo druženje, a ukupni rezultat prikupljenih sredstava oko 465 000 kruna.

Nadati se da će i preostala sredstva uskoro biti prikupljena, te stoga apeliramo na sve koji žele dvorac u Džennetu da pomognu ovaj hairli projekt.

I.K.

OBRAĆAMO VAM SE POVODOM MOLBE NAŠEG DŽEMATA VETLANDA DA IM SE POMOGNE U PRIKUPLJANJU SREDSTAVA ZA KUPOVINU OBJEKTA ZA DŽAMIJU U OVOM GRADU. CIJENA OBJEKTA JE PREKO 4 MILIONA KRUNA, A DŽEMAT JE PRIKUPIO OKO POLOVINU SREDSTAVA, TAKO DA IM JE POTREBNA NAŠA POMOĆ.

“...a šta god vi udijelite, On će to nadoknaditi, On najbolje opskrbljuje.

(Sura Sebe', 39)



APEL !

**POMOĆ ZA KUPOVINU
OBJEKTA ZA DŽAMIJU
U VETLANDI**

123 086 88 44






BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

UMRA

19. 12. - 30. 12. 2023.
Stockholm–Göteborg–Kopenhagen



HOTEL (MEDINA)
EMAAR ELITE
AL MEDINA

4 DANA



HOTEL (MEKKA)
DAR AL EIMAN
GRAND

6 DANA

AVIONSKE KARTE

PRIJEVOZ OD
AERODROMA DO
HOTELA I OBRNUTO

PRIJEVOZ IZMEĐU
MEKKE I MEDINE

POSJETE ZNAMENJIMA
MEKKE I MEDINE

USLUGE
VODIČA

NAPOMENA:

- Dokaz o uplati
- Kopiju pasoša
- Kopiju fotografije
- Broj telefona i e-mail adresu

dostaviti u pdf-formatu na e-mail:
kontakt@izb.se



Info telefon:
076 310 24 47

Četverokrevetna soba:
23990 SEK

Trokrevetna soba:
25490 SEK

Dvokrevetna soba:
27990 SEK

Uplate izvršiti najkasnije do 15. 11. 2023. na:
PG 799416-3 ili SWISH: 123 549 04 04
Al Iman Hajj & Tours

Broj članova po džematima

	13.09.2023	31.10.2023
Malmö	2262	2270
Stockholm	1789	1793
Göteborg	1411	1448
Orebro	1177	1205
Norrköping	1113	1132
Borås	1041	1048
Skövde	896	906
Landskrona	809	842
Västerås	739	752
Gislaved	740	747
Helsingborg	721	740
Linköping	639	667
Jönköping	614	630
Värnamo	628	618
Växjö	543	547
Trollhättan	473	497
Halmstad	467	481
Trelleborg	446	445
Vetlanda	243	243
Motala	234	230
Kalmar	221	217
Varberg	197	190
Surte	176	177
Trosa	168	171
Karlstad	123	126
Oskarshamn	23	28
Karlskoga	4	4
Ukupno	17897	18154

BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ





DUHOVNOST

POZIV POBUNJENOM ČOVJEKU

Kao Božija Riječ Kur'ān se na mnogo mjesta može čitati i kao mnoštvo usrdnih poziva "pobunjenom čovjeku".

Čovjeka se poziva da preispita svoj "ustanak" protiv Boga, da pokuša da se, čudoredno i preispitujuće, nadnese nad svoju osionost, zadrtnost, bigotizam i zastranu.

U tim kur'ānskim pozivima kao da vidimo neku nedokučivu, ali svakako snažnu "Božansku želju" da čovjek stane na Božiju stranu, da u sebi prepozna Božije stvorenje te, potom, da u sebi raskrije Božijeg štovatelja (abdullāha). K tome, kao da se osjeća i jedan tonalititet ili zvôn "Božanske saosjećajnosti" prema "odmetnutom čovjeku", "saosjećajnosti" sadržanoj u želji da se čovjek "vrati Bogu" i da od sebe odbaci "zaborav Boga".

Sūra Yā Sīn/Jāsin (36:77) moćno oglašava i jednu veoma strašnu Božansku optužbu protiv čovjeka. Naime, bude prilika kad je čovjek "otvoreni neprijatelj" spram Boga:

"ZAR ČOVJEK NE VIDI
DA GA MI STVARAMO OD SJEMENA KAPI,
A ON – NEPRIJATELJ OTVORENI!"

I drugdje su stranice Kur'āna protkane motivom o rečenoj "čovjekovoj neznatnosti" kad je bio "kaplja sjemena". Potom je prošlo vrijeme od nekoliko mjeseci, čovjek je rođen, uspravio se i prohodao. A onda minu godine, čovjek stasava, postaje snažan, osion, nehan. Često postaje "neprijatelj Božiji". Sūra Yā Sīn čovjeka podsjeća na njegov početak, kad sebe nije bio svjestan, kad ništa sa sobom nije

mogao. Tako se "otvoreno neprijateljstvo" pokazuje osim kao bahatost i kao – glupost i tupavost.

U ovom je smislu vrlo važno i mjesto u Kur'ānu u sūri al-Infī ār/Rascjepljenje neba, 82:6-9. Tu poziv "pobunjenom čovjeku" glasi ovako:

“O čovječe, šta te obmanjuje
[pa si nezahvalan] spram tvoga Gospo-
dara [Boga] plemenitoga,
Koji te je stvorio, i skladnim i uspravnim te učin-
io,
i u obličju kakvom je htio tebe je sastavio!
A ne valja tako! Vi Sudnji Dan lažnim smatrate...”

Kur'ān podsjeća da je sada posrijedi obmana. Čovjeka obmanjuje Ovaj svijet, puste želje, ambicije, pohlepa za imetkom... Naposljetku, nezahvalnost Bogu biva posljedicom koje se teško lišiti.

Božansko podsjećanje čovjeka da je "stvoren, učinjen skladnim, uspravnim, u dostojanstvenom obličju..." - sve to kao opomena sada dolazi od Boga.

Jer, naime, zaborav Boga vodi zaboravu Dana Sudnjega. Jedan zaborav ima za posljedicu drugi zaborav, i tako unedogled.

Na kraju, treba podsjetiti da se o svemu ovom govori i u sūri "Rascjepljenje Neba".

Zaboraviti Boga strašno je kao što je strašan prizor "Rascjepljenja Neba".

// Preporod.com., E. Karić

RAZLIKE IZMEĐU IZRAELSKJE VLADE, DRŽAVE, CIONIZMA, JUDAIZMA I JEVIJEJA KAO NARODA

Kako sam u protekle dvije decenije uporno insistirao da se postupci nekih muslimana i njihovih vlada ne pripisuju islamu i svim muslimanima, imam potrebu napisati ovaj post.

Naime, u afektu zbog strašnih zločina izraelske vojske i doseljenika nad palestinskim civilima u Gazi i izvan nje, mnogi zaboravljaju na važne razlike između: 1) izraelske vlade (ili vlada), 2) države Izrael, 3) cionizma, 4) judaizma i 5) Jevreja kao naroda i vjerske zajednice.

Izjava koja može biti prihvatljiva ako se odnosi na neku izraelsku vladu može biti neprihvatljiva u odnosu na državu Izrael. Legitimna kritika usmjerena ka državi Izrael može biti potpuno neprihvatljiva kada se adresira na cijelu jevrejsku zajednicu.

Previđanje ovih bitnih razlika samo će dodatno zamrsiti i pogoršati situaciju. Ograničit ću se na dvije posljedice.

Prvo, frontalni napad na Jevreje neminovno će ih homogenizirati pod vođstvom ekstremista.

Kad glasovi razuma među Jevrejima, kojih sada uopće nije malo, utihnu, tek tad ćemo žaliti što nismo znali bolje.

Drugo, usmjeravanje bijesa na cijeli jevrejski narod zbog postupaka jedne vlade ili države, koju većina ne priznaje kao jevrejsku državu, teško da može biti okvalificirano drugačije nego antisemitizam, oblik rasizma koji je nepri-

hvatljiv, kao i islamofobija.

Ove distinkcije treba imati na umu ne samo kad govorimo o trenutnim događajima u Palestini već i kad tumačimo svete tekstove ili govorimo o događajima iz prošlosti koji se navode kao presedani za nova postupanja.

Naprimjer, je li Poslanik Muhammed, a.s., postupio s plemenom Benu Kurejza kako je postupio zbog onoga što su učinili ili zbog onoga ko su bili?

Nemam sumnje da su njihovi postupci bili uzrok njegovih poteza na isti način na koji su postupci arapskih plemena bili povod vojnim akcijama halife Ebu Bekra. Kako god ne kažemo da je Ebu Bekr ratovao protiv Arapa već protiv murteda/pobunjenika tako, isto treba govoriti da je Poslanik kaznio izdajice, a ne Jevreje.

Zato, u svojim reakcijama fokusirajmo ponašanje i postupke, tj. zločine izraelske vlade, vojske, doseljenika i njihovih saveznika a ostavimo postrani njihov identitet.

Distancirajući se od zločina koje su činili muslimani često kažemo da zločini nemaju vjeru, ni naciju.

Neka nas ta ideja vodi i u ovim teškim trenucima.

/ Ahmet Alibašić, Preporod.info

KUĆNI LJUBIMCI U POSLANIKOVIM HADISIMA



Posjedovanje mačaka i pasa u kućama bilo je rasprostranjeno kod Arapa prije dolaska Muhammedovog, s.a.v.s., vjerzakona, koji je regulisao propise po pitanju držanja tih životinja u kućama.

Poslanik, s.a.v.s., je tražio lijepo ophođenje prema hajvanima/životinjama a posebno mačkama, koje se tretiraju od životinja koje najčešće ulaze u kuće ljudi. Allahov Poslanik, s.a.v.s., je volio životinje, a posebno konje. Podsticao je na human odnos prema životinjama, zabranjivao je da se muče i previše opterećuju. Govorio je: „Bojte se Allaha u pogledu ovih životinja koje ne mogu da govore i da se požale. Jašite ih samo ako su zdrave i jake i jedite od njih one koje su dobre za jelo (uhranjene). (Hadis je sahih a bilježe ga Ebu Davud, Ibn Hibban i Ibn Huzejme. Pogledaj Bin-bir hadis, br. 21)

Poznati su primjeri žene, grešnice, koja je napojila žednog psa i tim gestom zaslužila da joj Allah oprost, kao i slučaj druge žene, koja će biti kažnjena džehennemskom vatrom zato što je zatvorila mačku, ne dajući joj hranu i piće, dok mačka nije uginula. Svako mučenje životinja Poslanik, s.a.v.s., je zabranio: „Ne uzimajte za metu (pri gađanju) ono što ima dušu!“ (Muslim i drugi)

Razlika u propisima o psima i mačkama

Odmah na početku želim naglasiti da postoji velika razlika između mačaka i pasa. Psi su zabranjeni držati u kućama, jer Muhammed, s.a.v.s., kaže da mu je Džibril, a.s., rekao: „Mi meleki ne ulazimo u kuću u kojoj se nalazi slika ili pas.“(Buhari)

To potvrđuje i događaj kada je Poslanik, s.a.v.s., upitao Džibrila, a.s., zašto mu ne dolazi, pa mu je on pojasnio da u sobi, pod krevetom, ima štene s kojim su se igrali Poslanikovi unuci Hasan i Husejn. Tako da je Poslanik, s.a.v.s., naredio da se štene istjera iz kuće. Psi se drže van kuće za lov, čuvanje stada i usjeva, vođenje slijepca, otkrivanje droge, spašavanje ljudi iz ruševina i tome slično. Inače, ko bude držao psa, bez spomenutog razloga, svaki dan se od njegove nagrade umanjuje veliki dio (dva kirata). Psi su inače nečiste životinje, pa je zbog toga Poslanik, s.a.v.s., rekao: „Ako pas nalože kakvu tekućinu iz vaše posude, onda tu posudu, da bi opet bila čista, treba dobro zemljom istrati, a zatim sedam puta (vrelom) vodom ili nekim drugim sredstvom oprati.“(Muslim i Ebu Davud)

Što se pak tiče mačaka, tu je situacija drukčija. Dozvoljeno je da mačka uđe u kuću, pa i ako bi nalokala nešto od hrane ili pića, to ne smeta. Čak je dozvoljeno da se to jede, ako za tim ima potreba, jer je ona čista, pa je i ostatak hrane iza nje čist.

Evo nekoliko hadisa koji govore o tome:

Ebu Katade, r.a., prenosi da je Allahov Poslanik, s.a.v.s., u vezi s mačkom, rekao: „Ona nije nečista, ona je od onih koji kod vas često ulaze.“(Hadis je sahih, a bilježe ga Ebu Davud,

Tirmizi, Nesai, Ibn Madže i Ibn Huzejme)

Povod izreke i prenošenja ovog hadisa je sljedeći:

Ebu Katadina snaha po imenu Kebša je ispričala da je kod nje ušao svekar, poznati ashab Ebu Katade. Ona mu je pripremila vodu za abdest pa je ušla mačka i napila se iz te posude. On joj je još nageo posudu da se lakše napije. Ona je to s čuđenjem gledala, a on je priupita: „Zar se čudiš mom postupku.“ „Svakako“, odgovori ona. Tada joj on reče: „Zaista je Poslanik, s.a.v.s., rekao: ‘Ona nije nečista, ona je od onih koji kod vas često ulaze i izlaze?’“(Hadis je sahih, a bilježe ga Ebu Davud, Tirmizi, Nesai, Ibn Madže i Ibn Huzejme)

Također se prenosi da je Aišina, r.a., sluškinja jednom prilikom donijela joj hranu. Aiša je bila u namazu pa joj je išaretom pokazala da spusti posudu. Tada dođe mačka i uze nešto od te hrane. Kada je Aiša, r.a., završila s namazom jela je od te hrane i rekla da je Poslanik, s.a.v.s., rekao: „Ona nije nečista, ona je od onih koji kod vas često ulaze,“a također sam vidjela da je Poslanik, s.a.v.s., uzimao abdest od one vode koju je pila mačka.“(Hadis je sahih a bilježi ga Ebu Davud)

S obzirom da mačka često prolazi kroz kuću, Poslanik, s.a.v.s., je rekao: „Ako mačka prođe ispred klanjača, to ne kvari namaz, jer je ona pokućstvo.“(Hadis je sahih a bilježi ga Hakim)

Najpoznatiji prenosilac hadisa među ashabima je bio Ebu Hurejre (vlasnik mačkice), koji je imao mačku, s kojom se igrao i često je nosio u svom rukavu.

Poslanik, s.a.v.s., je iz samilosti prema ljudima i znajući da bi im to stvaralo poteškoću, za mačku rekao da je čista i da ne smeta što ona prolazeći kroz kuću, naloče posudu sa vodom. To ukazuje na to da je njena pljuvačka čista, bez obzira što je mačka od životinja koje nije dozvoljeno jesti. Međutim, ako bi se vidjelo da njena usta nisu čista, onda i posuda koju ona naloče nije čista. Definitivno od mačke imamo koristi, kao što je zaštita imovine od miša, pa je stoga dozvoljeno posjedovati mačku.

Također, treba napomenuti, da oni koji posjeduju mačke, moraju imati u vidu da je mačiji izmet nečist, pa ako bi gdje u kući obavila nuždu, onda to mjesto postaje nečisto i nije dozvoljeno na njemu klanjati, niti po njemu hodati, dok se ne očisti. Stoga, smatramo najprikladnijim da mačka bude u svojoj posebnoj kućici, van prostorije gdje žive ljudi, ali kada uđe u kuću onda se tu primjenjuju spomenuti propisi.

Interessantno je ukazati da je Poslanik, s.a.v.s., u ovim hadisima, kada govori o mački, koristio izraz tavvafin alejkum, tj. oni koji kruže oko vas poslužujući vas. Tako se inače opisuju sluge i sluškinje koje se puno kreću po kući, ulazeći i izlazeći iz nje. Prema tome, Poslanik, s.a.v.s., je mačku usporedio sa slugama, koji mnogo ulaze u kuću, ali oni ipak ne borave u istoj prostoriji u kojoj budu ostali stanari kuće.

/ Fuad Sedić, prof., Preporod.com



SVJETSKI DAN BORBE PROTIV DIJABETESA: EDUKACIJU O ŠEĆERNOJ BOLESTI UČINITI DOSTUPNIJOM

Svjetski dan borbe protiv dijabetesa obilježava se 14. novembra svake godine u cijelom svijetu, a fokus ovogodišnjeg obilježavanja je na dostupnosti edukacije o šećernoj bolesti sa sloganom "Edukacijom za bolje sutra".

Kako navodi rukovoditeljica Odjeljenja za promociju zdravlja u Institutu za zdravlje i sigurnost hrane Zenica dr. Elma Kuduzović, šećerna bolest ili dijabetes mellitus je hronična bolest koja nastaje kad gušterača ne proizvodi dovoljno inzulina ili kad tijelo ne može djelotvorno upotrijebiti proizvedeni inzulin.

- Inzulin je hormon koji proizvodi gušterača, a omogućava stanicama preuzimanje šećera iz krvi i njegovu preradu u energiju - ističe dr. Kuduzović.

Najčešći tipovi dijabetesa su Dijabetes tip 1 i tip 2. Tip 1 (ranije poznat kao inzulin - ovisni ili s obzirom na početak bolesti mladenački ili dječji dijabetes) kojeg karakterizira nedovoljna proizvodnja inzulina što zahtijeva njegovo dnevno unošenje. Uzrok te vrste dijabetesa nije poznat i dosad nisu poznate ni mogućnosti njegove prevencije.

Dijabetes tipa 2 (ranije poznat kao inzulin - neovisni ili s obzirom na vrijeme početka bolesti - dijabetes odraslih) nastaje kao rezultat nemogućnosti djelovanja inzulina u

organizmu. Dijabetes tipa 2 zahvata gotovo 90 posto oboljelih od dijabetesa i uglavnom je rezultat prekomjerne tjelesne težine i tjelesne neaktivnosti. Simptomi mogu biti slični simptomima dijabetesa tipa 1, ali su najčešće manje izraženi. Stoga se ta bolest često dijagnosticira tek nekoliko godina nakon samog početka, kad su već prisutne komplikacije. Iako se taj tip dijabetesa javlja uglavnom u odrasloj dobi, može se pojaviti i kod djece.

Statistika pokazuje da u svijetu od šećerne bolesti boluje 537 miliona ljudi u dobi od 20 do 79 godina, a procjenjuje se da će taj broj iznositi 643 miliona do 2030. godine. U svijetu svake godine od šećerne bolesti umire 6.7 miliona ljudi odnosno jedna osoba svakih pet sekundi, a gotovo polovica je mlađa od 60 godina.

Većina oboljelih boluje od šećerne bolesti tipa 2 koja se u 80 posto slučajeva može spriječiti promjenom životnih navika. Budući da jedan od dvoje oboljelih u svijetu nema postavljenu dijagnozu šećerne bolesti, rano otkrivanje i liječenje su ključni u sprječavanju nastanka komplikacija te bolesti. Podizanje svijesti o znakovima, simptomima i rizičnim faktorima su stoga od velike važnosti za pravodobno otkrivanje šećerne bolesti.

Faktori rizika za nastanak dijabetesa tipa 2 su nedostatak fizičke aktivnosti, prekomjerna tjelesna težina, nezdrava ishrana, porodična historija bolesti i visok krvni pritisak. Simptomi i znaci dijabetesa su učestalo mokrenje, povećana žeđ, nedostatak energije, gubitak tjelesne težine, zamagljen vid, usporeno zarastanje rana, te trnci u rukama i nogama. Simptomi koji su više specifični za djecu su bol u stomaku, glavobolje i problemi u ponašanju.

- Ako imate šećernu bolest važno je redovno ići na kontrole kod ljekara, iako se možda osjećate dobro i nemate tegobe. Kasne komplikacije šećerne bolesti razvijaju se tiho i na početku ne daju simptome. Zbog toga ih je važno što prije otkriti, da bi se njihov razvoj usporio ili zaustavio. Na kontrolama ljekar dobije uvid u Vaše zdravstveno stanje i može znati treba li Vam prilagoditi, dodati ili promijeniti terapiju. Osim specifičnih kontrola koje inače provodi ljekar, važno je obaviti godišnju dijabetičku kontrolu jer se tako dobije kompletna slika Vašeg zdravstvenog stanja - navode iz Instituta za zdravlje i sigurnost hrane Zenica.

Svjetski dan šećerne bolesti obilježava se 14. novembra dvadeset i prvu godinu zaredom, u skladu sa preporukama Međunarodne dijabetičke federacije. Tema obilježavanja Svjetskog dana šećerne bolesti 2021. - 2023. godine je Dostupnost zdravstvene zaštite.

(Preporod.info)



KO TEŠKO ŽIVI, LAHKO MRIJE

"Majka nije dozvolila da iko piše po našim tijelima. Pozvala nas je u šator. Između njenih suhih prstiju hemijska sa crnim mastilom koju je voljela i držala u fijoci.

Počela je od mene: Dođi Ahmede.

Napisala mi je puno ime na ruci:

Ahmed Rašid Salih

Ime majke

Godina: 9

Krvna grupa

Mjesto prebivališta

Naselje Zgrada

Dok je pisala, puno me je ljubila, na lijevom pa desnom dlanu, zatim na ramenima, na leđima, na stomaku, na stopalima, na grudima.

Zatim je pozvala moju sestru Hibu, čitao sam šta piše.

Iste informacije, s tim što je Hiba imala 5 godina. Zatim Rašid, on ima 3

godine, ali njegovo tijelo je malo, ne mogu sve riječi stati.

Pa je rekla: Rašid se neće izgubiti daleko od nas - prepoznat će ga po nama - držat ću ga u naručju.

Zatim nas je pogledala sa malim osmijehom i iskrivljene glave, rekla je: Ne plašite se! Ja sam po cijelom svom tijelu ispisala da sam ja Umm Ahmed Hiba Rašid, supruga šehida Fehmi Saliha.

Skupiće nas zajedno.

Skupiće nas zajedno.

Makar nam samo dijelovi tijela ostali."

Autor: Samedin Kadić



ZEMLJI BOSNI
 Allahu hvala ti
 Mehmedalija
 mi u snove
 navrati
 Mak naslonjen na
 vrata Husejnije
 sluša
 dok ja
 Zapis o zemlji
 recitujem
 ne sjećam se
 da li u snu
 ili polusnu
 kalemom
 nižem
 riječi

Umorna od sna
 lijena od sna
 hasta od sna
 Bosna

dosta je sna
 Bosono
 preni se
 vakat je
 Ustaj

životom se
 živa rana
 vuče
 probudi se
 Bosnae
 moja
 zov
 osluhni
 vakat je
 Bosono
 zahvati vode
 sa Drine i Une
 umij se na Sani
 potari glavu na Savi
 operi noge u Neretvi
 srce očisti na Vrelu Bosne
 dušu napoji na Vrelu
 Bune
 vakat je odavno zemljo
 Bosno.

/ Preporod,
 Osman Kavazović,



"Kad meni neko kaže da me voli, ja ti se onda i nogama i rukama odgurujem od toga, jer ja to dobro ne razumijem. Jedino razumijem kad ja kažem da ja nekoga volim. Ali, valja i to savladati. Sam taj pojam ljubavi meni je prilično složen i zagonetan, iako imam uputu o tome šta je ljubav u jednoj od Božijih knjiga, a to je Indžil u kojoj ima čuvena Pjesma o ljubavi. .. "Ljubav je dobrotiva, sve vjeruje, svemu se nada, nikad ne prestaje, ne hvali se, ne traži svoje ... " To je dakle jedna pjesma o ljubavi u kojoj se tačno govori šta je ljubav. Ali, ako se nogama i rukama odgurujem kad čujem da mene neko voli, onda ja smijem da kažem da volim Allaha dželle šanuhu i Muhammeda alejhiselam i moj bošnjački narod."

Nedžad Ibrišimović, pisac

FACEBOOK



ISLAMSKA ZAJEDNICA BOŠNJAKA
U ŠVEDSKOJ



WWW.IZB.SE



Media centar
Islamske zajednice u BiH

Radio



Novina

Preporod
ISLAMSKA
INFORMATIVNE
NOVINE

Agencija



Portal



Produkcija





islam.ba

BILTEN

Informativne novine
Islamske zajednice Bošnjaka u
Švedskoj

GLAVNI UREDNIK
Idriz-ef. Karaman,
glavni imam

IZVRŠNI UREDNIK
Nezir-ef. Špiodić

E-MAIL:
bilten@izb.se

WEB:
www.izb.se

IZDAVAČ:
Islamska zajednica Bošnjaka u
Švedskoj

SEKRETARIJAT


Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10,
461 53 Trollhättan

BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ





BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

Sretan 25. novembar
Dan državnosti
Bosne i Hercegovine.